

16 SEP 2002

Mahathir-Iraq/I

PBB PATUT MINTA IRAQ BENAR KEMASUKAN PEMERIKSA SENJATA, KATA PM

PUTRAJAYA, 16 Sept (Bernama) -- Pertubuhan Bangsa-bangsa Bersatu patut meminta Iraq membenarkan pemeriksaan senjata memasuki negara berkenaan dan kemudian mengurangkan sekatan yang dikenakan terhadap negara yang kini miskin itu, kata Perdana Menteri Datuk Seri Dr Mahathir Mohamad hari ini.

"Sekatan tidak menyusahkan Saddam Hussein (Presiden Iraq), ia tidak akan membuatnya mati. Ia menyusahkan rakyat miskin Iraq, termasuk mereka yang sakit, mereka yang tua, bayi...mereka inilah yang membayar harga bagi tindakan sekatan.

"Mereka ini tidak bertanggungjawab terhadap apa jua yang dilakukan oleh kerajaan Iraq," katanya kepada pemberita selepas merasmikan bangunan baru Perbendaharaan di sini hari ini.

Amerika Syarikat dengan hasratnya untuk mengebom Iraq mengamalkan pilih kasih apabila dari satu segi ia memberitahu negara-negara di dunia supaya mematuhi undang-undang antarabangsa tetapi dari satu segi lagi, jika peraturan itu tidak memberi faedah kepada Amerika, mereka tidak mepedulikannya.

Dr Mahathir memberi amaran bahawa serangan Amerika terhadap Iraq hanya akan melanjutkan perang terhadap keganasan.

"Saya ingat begitu, ia akan memanjangkan tempoh perang anti pengganas," katanya.

Perdana Menteri berkata Malaysia sememangnya arif mengrnai perkara itu kerana negara telah melalui pengalaman memerangi pengganas selama kira-kira 42 tahun.

"Ia mengambil masa 42 tahun bagi kita untuk mengalahkan pengganas. Bukannya mudah. Pada siang hari mereka mungkin menjual sayur kepada anda, dan pada malamnya mereka mungkin menjadi pengganas. Mereka mungkin jiran anda hari ini, keesokannya mereka mungkin akan meletupkan diri mereka dari sebuah kapal terbang," katanya.

Beliau berkata Amerika Syarikat perlu mengambil kira sokongan negara-negara lain sebelum mengambil langkah drastik menyerang Iraq.

"Kita hendak elak daripada timbul perasaan marah, benci orang Islam. Kalau dia (Amerika) serang Iraq, negara-negara yang bermusuhan dengan Iraq pun tak bersetuju, termasuk Arab Saudi.

"Kalau dia serang juga sudah tentu orang Islam akan berasa di diskriminasi dan kebencian kerajaan Islam (akan meningkat)," katanya.

Ditanya jika kewibawaan PBB tercabar dengan tekanan Amerika itu, beliau berkata PBB dicipta oleh kuasa-kuasa besar untuk kepentingan mereka.

"Di zaman itu jumlah negara adalah terhad jadi mereka berpendapat kalau ada PBB mereka boleh guna PBB untuk menghalalkan segala tindakan mereka. Tetapi apabila PBB kukuh dan banyak negara menjadi anggota PBB, maka kuasa-kuasa besar mendapati mereka tidak boleh lagi manipulasi," katanya.

Dr Mahathir berkata negara-negara ini akan cuba memperalatkan PBB untuk tujuan mereka sendiri dan jika ia tidak boleh diperalatkan, pertubuhan itu akan dilupakan begitu sahaja.

Perdana Menteri menarik perhatian bahawa pengganas boleh berada di mana jua di dunia dan amat sukar untuk mengenalpasti mereka.

"Ini tidak bermakna bila mereka datang ke negara ini, kita memberikan mereka perlindungan atau sokongan. Kita tidak tahu siapa mereka...kita tidak sedar. Jika ada yang memberitahu kita dari awal lagi tidak mengapalah, kita boleh ambil tindakan tetapi apabila kita mengambil tindakan mengikut Akta Keselamatan Dalam Negeri (ISA) mereka (negara Barat)